



## Suáđi já ráávhu juovlah

Juovlah láá eromášávt ráávhu já ráhisvuodâ juhle. Tondiet lii ahheev, ete ovdláhháá tai juovlâi Jeesus šoddâmkuávluin lii suáti. Suáti aalgij, ko Hamas terroristeh julmeht volliitti sivilij vuástá Israelist. Panttâfangân valdum ulmui kolgâmušah čyeccih vááimu.

Iberdetteht já vuoigâlávt Israel lii västidâm volliitmáid. Ton čuávumuššân sivilieh, kiäh ääsih Gazast já kiäin ij lah uási terrortavoin, láá pááccám kaskoo suáđi. Tile lii olmoošlávt tuođâi väädis. Kuávlust ässee ulmuuh tarbâšeh purrâmuš já juhâmuš, talkkâsijd já syeje.

*Hiärrá, äärmit ulmuid kaskoo suáđi. Pyevti tuu ráávhu kaskoo suáđi. Iällát tuáivu, ete puoh poččâvuodâid puávtáččii sooppâđ já kyeđđid tuáhá.*

Pase enâmist orroo suáti ij kuittâg mitáttist juovlâi merhâšume ráávhu juhlen. Peic tile tuš tiäddud ristâlâj juovlâi váimussaavâ. Ađai tom, ete Kristus, Immeel Kandâ, šadda olmožin eelliđ ulmui eellim já killáđ mii paaldâst. Immeel šoodâi Jeesusist olmožin piäluštiđ mii, tastko sun ráhistij olmooškode mielâttes ennuv. Immeel ij hilgo mii, peic sun jotá miiguin sevŋâdumos-uv puudâin.

*Hiärrá, pyevti juovlâid mii váimoid. Adde Kristus puáttiđ mii eellim sevŋâdâsân, čuovvân mijjân. Rávhudit mii liävuttes mielâid já raavhâ mist mietitobdo nubijdân kuáttá.*

Suáti pase enâmist juátkoo ávus suáttin teikâ cahhee konfliktin máhđulávt vala kuhháá. Konflikt historjá lii jo tääl aabâs liijkás kuhes. Konflikt käibid ráávhu ráhteid já hiäivulii tile aalmugij njunošijn. Häärvih mist pasteh vaiguttiđ maailm kriisáid, mutâ liijká juáháš mist puáhtá toohâđ ennuv. Mij pyehtip ráhtiđ ráávhu kaskoo jieččân aargâ, piäiválijn teivâdmijn. Jyehi vááimu jurdâččemvyevist lii merhâšume.

Tai juovlâi muu tuoivâ já rukkoos lii, ete juovlâi saahâ ráávhusst já tuáivust Jeesus Kristusist rávkká mii uđđâ ráhisvuotân nubijdân kuáttá.

*Hiärrá, tun kote Kristusist poottih mii viljân aabâs alda. Adde mijjân juovlâráávhu. Pyevti ráávhu taan tuu oles maailmân. Aamen.*

Oulust advent ääigi älgidijn 2023

Jukka Keskitalo  
Oulu pispekode pispe